

# Keputusan diragui

9 MAR 1990

## Dua pesilat harapan kita dibatalkan

BANDAR SERI BEGAWAN — Perasaan Abdul Razak Yassin bengkok dan kesal, sementara kelopak mata Sheik Alauddin Yacob berenang dengan air mata kehampaan.

Demikian gambaran wajah dua pesilat Singapura yang dibatalkan perlawanan masing-masing dalam peringkat separuh akhir, di Pusat Belia petang semalam.

Mereka gugur daripada persaingan ke medan akhir bukan kerana kurang hebat, tetapi kedua-dua pencabarnya yang kebetulan daripada Brunei tidak dapat meneruskan perlawanan kerana tercedera pada leher.

Menurut undang-undang silat, seseorang pesilat yang mencederakan pencabarnya pada bahagian anggota badan yang tidak dibenarkan sehingga pencabar itu tidak dapat meneruskan perlawanan, maka kemenangan akan diberikan kepada pesilat yang cedera itu.

Tetapi dalam perlawanan antara Razak dengan Hairwan Haji Akop dalam kelas G lelaki dan Alauddin dengan Aziz Tuah dalam kelas

I lelaki, adalah diragukan bahawa kedua-dua pesilat Brunei itu mengalami kecederaan dan tidak dapat meneruskan perlawanan.

"Saya sekadar tersiku pada bahagian atas dada kirinya peserta Brunei itu, yang kemudian mengeluh kesakitan pada lehernya," jelas Razak, 22 tahun.

Sebelum insiden itu, pesilat Singapura jelas lebih unggul dan dijangka memenangi pertarungan tersebut.

Tidak semua penonton Brunei yang setuju dengan pengumuman wasit yang memberikan kemenangan kepada Hairwan setelah doktor mengesahkan peserta itu tidak boleh meneruskan perlawanan.

Sedang para pegawai dan peserta Singapura sekurang-kurangnya dapat menelan kepahitan kekalahan Razak, tetapi keadaan agak tegang sedikit apabila Alauddin, pemenang pingat perak Sukan SEA, menerima nasib yang serupa dalam pertemuannya dengan Aziz.

Insiden berlaku dalam pusingan kedua apabila Alauddin, yang memusingkan

badannya sambil melepaskan tendangan ke arah Aziz yang cuba meluru telah terkena sebahagian daripada lehernya lalu jatuh.

Wasit dari Malaysia telah mengarahkan doktor untuk memeriksa Aziz dan kemudian mengumumkan Aziz tidak dapat meneruskan perlawanan dan diisytiharkan sebagai pemenang.

Tetapi sebelum pengumuman dibuat, Alauddin yang seperti telah pun mengetahui akan keputusannya, telah membuka baju perlindungan dan menghempaskannya ke lantai gelanggang kerana kecewa dengan apa yang telah berlaku.

Perbuatannya itu telah menimbulkan sedikit kemarahan para penonton tetapi mujurlah para pegawai Brunei dan Singapura yang lain dapat meredakan keadaan.

Sebelum itu, lima peserta Singapura yang lain juga terkandas dalam peringkat separuh akhir.

Dengan ini Singapura hanya mengutip lapan gangsa dalam acara silat olahraga ini. — YUSOFF RAHMAN.



RASAKAN: Pesilat Singapura, Abdul Razak Yassin (kanan), melepaskan satu tendangan ke arah saingannya dari Brunei, Hairwan Akob.